



Jumat, 10 September 2021

Ogen: Masmur 1:2



"Matuhi Ras Ngukuri Kata Dibata"



Pernah nge kam ngoge Pustaka Si Badia tep-tep wari? Piga kali nge seminggu ogendu Pustaka Si Badia e? Selaku kalak Kristen, nggo seharusnya kita membiasaken guna ngoge Pustaka. Tapi, amin gia lit kita enggo tep-tep wari ngoge Pustaka, apakah kita nggo matuhi ras ngukuri Kata Dibata e? entah terjeng gelah nggo sioge. Kata e me Dibata, berarti kalak si matuhi ras ngukuri Kata Dibata e arusna geluhna nggo baci jadi pasu-pasu labo terjeng man bana secara pribadi tapi man kalak sideban pe.

Rikut ras bahan ogenta sendah, Pemasmur ngataken, keriahen si tuhu-tuhu bas ndalani kegeluhenta enda emekap matuhi undang-undang Tuhan dinggen ngukurisa suari ras berngi. Kerina jelma pasti ndarami keriahen ukur ras keriahen e sidatken i bas kataNa nari. Pernah nge datndu nanam si bage rupana? Melala jelma ndarami keriahen ukurna arah perbahanen si salah. Tapi bas Dibata, iberekenna kita kesempatan ndatken keriahen bas kegeluhenta arah ngoge kataNa nari.

Bali bagi sekalak Bapa si mereken pedah man anakna tapi ia la ndalanken kerna kata ajar e man dirina. Emaka Dibata mereken kata ajar man banta sabap Dibata me usihenta bas Kata e. Emaka iarakenna kita baci matuhi ras ngukuri kerna Kata e. Nggo nge kita ngasup? Kita me si ikataken anak-anak Dibata emaka pasti ibereken Bapata man banta kengasupen guna matuhi kataNa e. Mari, sipakeken Kata Dibata e jadi palas man kegeluhenta. Bagi kataNa ndai, sidatken me kerna keriahen situhu-tuhu amin gia melala perbeben kegeluhen e, kataNa e pe mabai kemalemen ate si tuhu-tuhu. Kata Dibata e harus sipeturah bas kegeluhenta gelah jadi kiniteken si paguh bas kegeluhenta. Tambahilah kinitekenta e alu matuhi ras ngukuri Kata Dibata. Tutus ateta matuhisa pasti sidalanken kerna sura-sura Dibata e jadi keriahenka man Dibata. Si intropeksi dirinta kerna matuhi ras ngukuri Kata Dibata e.